



國雅卷之十五

勾吳顧起綸玄言選

李觀察

名攀龍字于鱗號滄溟山東濟南人嘉靖中官河南按察使

錄別二首

千秋一嘉遇此別安可知良時不努力賤軀欲何爲晨
風野蕭條浮雲西北馳河梁臨往路遠望令人悲遊子
各有懷悠悠當告誰

秋風西北來蕭蕭動百草蕩子無室家悠悠在長道紅
顏能幾時棄捐一何蚤對客發素書零涕復盈抱上言
故鄉好下言故人老

賦得金谷園

石家離館在河陽。堦下潺湲蘭杜香。步障連雲圍錦繡。
層臺插漢號清涼。車騎紛紛綵霧來。後園綺宴掃花開。
鮮妝二八皆名伎。一一芙蓉護酒杯。光風乍汎沙棠枝。
小腰麗女翠鬟垂。嬌歌競度思歸引。舞按明君出塞辭。
誰其侍者字綠珠。搖璫曳縠閒且都。意惋崑崙青窈窕。
色寒滄海紅珊瑚。新聲裊裊落梁塵。鬪寵含情向暮春。
同時粉黛俱回首。爭道蛾眉不讓人。歲歲芳菲私自憐。
眼中若個比嬋娟。那能便遣豪門去。從此繁華坐黯然。
灑淚飛軒羣妾愁。玉顏今日盡高樓。徒令碧血埋秋草。

金谷千年澗水流

○雪後過殿卿湖亭并聽江山人彈琴得集字

夜來北渚北風急。打頭雪花大如笠。片紙東飛右史書。
詰朝小作湖中集。到門白鳥出高巢。繫馬南山迸人入。
使君亭午未解醒。肅客登筵一長揖。地僻兼無俗子妨。
樽空況有隣家給。意氣還須我輩看。功名但任兒曹立。
轉眄忽驚青歲徂。沾唇莫信金杯澀。世上悠悠已自諧。
卽今不飲嗟何及。醉聽楚調起寒雲。絲筆憑陵朱絃濕。
平生多少伯牙心。此日因之寄篇什。

○送新喻李明府伯承

爾昔紅顏客薊門獻書不報哀王孫一朝致身青雲裏
座上還開北海樽余亦題詩鄩隗臺燕山秋色對銜杯
論交共惜黃金盡此處空悲駿馬來可憐郢曲今亡久
下里之歌吾何有文章稍近五千言雅頌以還十九首
才子新傳白雪篇江城忽借使君賢那堪西署爲郎者
多病離居卧日邊

刁斗篇

陰山戰合胡天黑漢兵大呼單于北邊秋日落五原屯
積火夜連千竈食驃騎橫戈拂鐵衣悲風黃草白榆飛
渡河烏陣旌旗伏卧壁龍沙鼓角希征人馬上援枯骨

滿地清霜刁斗發朔氣遙傳瀚海雲寒聲亂動輪臺月
掩笳驕虜聽垂泣按劍材官怒指髮宮女琵琶咽逝波
使臣旄節彫幽窟誰能絕漠掃妖氛哀響如今不可聞
六郡少年思轉鬪撻金猶憶李將軍

送謝茂秦

孝宗以來多大雅布衣往往稱作者謝家玉樹操郢音
其曲彌高和彌寡寓梁曾曳王門裾遊燕欲薦中涓馬
豈無冠蓋映當時滿眼悠悠世上兒文章千載一知己
交結何須鍾子期此物有神兼有分富貴浮雲不與之
盧楠坐銜越石恩醉後感激肝膽言蒼鷹睚眦鸚鵡賦

身挂羅網何由翻殷憂楚奏秦庭哭遂雪黎陽國士冤
歸去東將釣滄海安能貧賤常丘樊蚤借江鴻報消息
或卧春雲且故園

擊鹿行

余往與王生過子與見伏鹿於庭戲相謂曰余將携徐夫人七首刺此鹿麋腊之也

生豈不願爲我犄角之哉又與王生過子與則子與刺殺此鹿食王生旣而宗生亦至相與批

脯飲也亦大豪舉哉乃

各賦擊鹿行壯之

徐卿意氣殊不偶買鹿百金求其牡華堂燕客忽自放
醉把邯鄲鐵七首須擬麟從帝藪游未聞鹿觸匈奴走
高材吾黨復誰過文章矯矯驅羣醜失日難將四海求
逐來定死諸公手毛灑旋疑霜雪寒角摧更見珊瑚朽

王郎大叫奉銅盤接飲其血軟以酒顧我前呼歷下坐
與君相愛爲君壽舊時疾足今能否安得新詩滿人口
須臾碧眼胡兒至落礎脯腊無不有下箸已畏翠釜空
織羨更出青閨婦衆看杌上肉如陵覆蕉尚在隍中守
嗟乎曲士夢何久徐卿獨醒可與友

送孟得之

十載薊門客秋風見長年思家明月夜驅馬白雲天來
鴈授衣後黃花落帽前何人過携酒共醉黎陽天

○送諸光祿還於越

幾年東省月坐憶故園遊忽有緘書至蘭亭楔事修芙

國雅卷十五
蓉天鏡曉風雨石帆秋。到夜應逢雪。門多棗與舟。

白雲樓

諸郎難得意。非是敢沈冥。拙宦無同病。清時有獨醒。千家寒雨白。雙闕曉煙青。又值高樓鴈。寥寥不可聽。

送殿卿

嗟君復失意。吾道轉堪疑。白雪論先達。青雲合後時。落花寒食過。載酒故山期。莫以楊朱淚。春風灑路岐。

送張比部募兵秦晉諸郡

天威嚴滅虜。使者出秋官。白羽徵兵入。黃金結士懽。風雲千騎動。雨雪二陵寒。無易行間客。能登漢將壇。

送沈郎中守順慶

見說褰帷處。千山擁使君。嘉陵渡春水。棧道轉秋雲。郡下平蠻檄。家傳諭蜀文。病餘饒卧理。能不憶離羣。

出部

出部隨吾適。人家杜曲邊。溪流縈去馬。山路入鳴蟬。禾黍殷秋作。茅茨足晝眠。可能祛物役。歸買汶陽田。

碧雲寺禪房

佛土秋逾淨。花臺夜復香。一燈醒夢幻。孤磬散清涼。月上禿輪滿。湖開天鏡光。新詩分妙偈。病客對空王。

同元美與諸比部蚤夏城南放舟

國朝卷十五
言尋韋杜曲。與客放船行。樹影含衣動。溪光逼酒清。狂
來出真態。醉裏見浮生。所以山公後。寥寥達者名。

夜過元美

病卽科頭出。狂仍枕腹眠。禮非因我設。汗不受人憐。興
盡銜杯外。言深把燭前。開門看墮月。騎馬問朝天。

和許長史五日峭山湖亭燕集

城頭片雨懸。客醉峭湖邊。酒柰榴花妬。人堪桂樹憐。五
絲還令節。雙鬢祇流年。莫踏王孫草。淮南雅好賢。

同殿卿遊南山天井寺

古寺馬蹄前。荒山斷復連。階危孤石擁。崖響亂泉懸。喬

木堪知午。迴峯欲隱天。不因許玄度。誰此得攀緣。

郡城送友人二首

西來山色滿城頭。東望漳河入檻流。傲吏歲時頻臥閣。
故人風雨一登樓。亂離王粲逢多病。著作虞卿老自愁。
君到長安相問訊。誰憐五月有披裘。自作更佳

徙倚高樓問索居。故人湖海意何如。樽中十日平原酒。
袖裏三年薊北書。大麓夏雲當檻出。石門寒雨過城疎。
明朝遠道空相憶。那得仍停使者車。

再寄元美

中丞遼海罷登壇。公子紅顏復挂冠。會有綈袍憐范叔。

休將七首過燕丹上書北闕風雲變灑淚西山雪雨寒
憔悴儘堪知國士相逢俱作少年看

○送盧次楨往建業謝故陸令

中原慘淡吾垂老河朔蕭條爾更存書上梁王還寢獄
賦成揚子不過門大江雨雪千帆出建業風流六代淪
短劔自憐遊客意左驂寧負主人恩

賦得雙塔寺

雙鴈何曾落殿陰長留寒影向青岑珠莖綴露分仙掌
花鐸含飈雜御砧雙闕星河秋色曙千家烟雨夕陽沈
飛鳧欲下吹笙侶天外遙依識鳳林

○送許右史

少年裘馬日紛紛老去誰應更識君酒態美如嵇叔夜
詩才清似沈休文曳裾忽動梁園雪飛蓋兼停鄴下雲
試向樽前看過鴈春風那不念離羣

酬答明府見寄

清時詞客滿公車獨向漂零嘆不如老去已拚常縱酒
秋來何意爲裁書薄遊更自淹華省多病惟堪返敝廬
共道子雲長筆札知君近日五侯踈

蚤春得汝思蜀中書

萬里誰傳錦字迴楚天搖落正堪哀揚舲巫峽江聲合

立馬岷峩雪色來西極使星遙入部中原人日好登臺
莫言羽獵誇胡後不數揚雄作賦才

送暉員外按察郢中

醉擁驪駒不可留送君花發鳳凰樓青春開府西陵色
到日登臺北鴈愁寒雨遠分荆楚望白雲無盡漢江流
共知人世悲難合儻得隋珠莫暗投

韋氏池亭同元美子與子相賦

貫酒新豐解佩力相逢意氣爲君豪孤亭晝敞杉松色
亂石青含薜荔高自向風塵偏勝蹟豈令湖海傲吾曹
從他桂樹山中發招隱何勞更反騷

送李司封謫廣陵

明光起草羨青春服藥求仙笑此身白首雲霄空薦士
黃金湖海未逢人廣陵鴻鴈來秋色寒雨江楓度逐臣
見說故園湘水上嬾將詞賦弔靈均

十五夜子與明卿見過

日落青梧白露生倦遊詞客鳳凰城千門過鴈來秋色
萬里銜杯對月明上苑寒高金狄掌西山影靜羽林兵
解顏今夕無烽火二妙何當罷請纓

張駕部宅梅花

仙郎雪後建章迴清夜西堂擁上才笛裏春秋愁燕塞滿

梁間月色漢宮來。卽看芳樹催顏鬢。莫厭寒花對酒杯。
共憶故人江北望。因君罷賦倚徘徊。

宣武門眺望

白雲千里接胡天。雙闕遙臨碣石懸。漢苑春生多雨雪。
薊門晴色滿寒煙。五陵佳氣蓬萊外。大漠青山睥睨前。
夙昔黃金收駿馬。高臺空在有誰憐。

真定邸中重憶殿卿

客舍題詩已日曛。當時此地重離羣。青樽夜倒滹沱月。
紫馬嘶秋大陸雲。春色那堪愁裏望。緘書何意病中聞。
依然趨府諸年少。不見風流許使君。

送張肖甫出計閩廣

聞道天書出漢宮。君才博望遠相同。少年章奏郎官裏。
大海樓船使者中。度嶺春陰生白瘴。及閩秋色暗青楓。
懸知諸將平胡日。聖主先論轉餉功。

元美望海見寄

白雲東望十洲開。苦憶玄虛作賦才。大壑秋陰生蜃氣。
扶桑日色照樓臺。波濤漢使乘槎過。風雨秦王策石來。
縱有三山何可到。不如相見且銜杯。

殷太史正甫至自太山爲贈

明堂天子昔登壇。御道風流擁漢官。海色迴臨三觀動。

春陰不散五松寒白雲忽向封中出玉牒誰從篋裏看
此日蒲朝求禪草相如蚤晚入長安

秋日懷王元美三首

匣裏龍泉北斗文携來燕趙客如雲自言此劍千金買
不是窮交不借君

落魄初看逐客情風流又似棄繻生路傍年少從他問
不必停車說姓名

十載交游滿帝都五陵年少避呼盧只今惟有張公子
匹馬時時過酒徒

送鄭叅戎之銅仁

漢將承恩意氣多樓船十道下牂牁憐君本自山東妙
更許何人繫尉佗

神通寺

金牛谷裏樹蒼蒼一入千峯但夕陽浪跡莫愁難問訊
題詩多在朗公房

再送許右史二首

萬國稱藩擁至尊一時詞客出王門但教日奉西園宴
莫道應劉不是恩

桃花美酒鳳凰樓公子乘春作宦遊寒食不知何處過
縱無風雨亦堪愁

李尚寶

名先芳字伯承號北山山東濮州人嘉靖中官尚寶卿

望金山寺

金山壁立鎮中洲黛色橫江日夜流勢借神鰲盤砥柱
氣飄靈蜃結層樓澄澄水月空中見隱隱芙蓉海上浮
我欲舍舟凌絕頂妙高臺上望 神州

宿天池寺

南下潯陽道遙見匡廬山以余蘿薜情睠茲山水間舍
車陟脩坂飛鳥扣禪關禪關寶塔凌雲起古刹霏微挂
天紀鳥道不聞金磬聲龍泉半落銀河水錦澗橋邊凭
玉欄萬嶺松杉白日寒恠石嶙峋真虎踞迴蹊歷亂俱

嶠蟠更覓真源向何處杖藜直指天池去石榜孤懸古
竹林洞簫忽下羣仙馭遂有周顛騎白龍拍肩並駕九
奇峯天眼尊者持丹藥赤脚高僧獻紫筇須臾水月湧
金沙法鏡澄澄照落霞浮光着樹皆甘露靈氣飛空卽
雨花文殊臺上天燈燦佛手巖前石髓嘉名香仙梵三
天外紺殿玄珠綴華蓋振衣獨立上霄峯五湖九江纔
一帶山迴風高吹日暝歸依夜宿匡廬頂天雞一唱石
門開夢裏聞鐘徹清境拂曙憑虛下紫氛竹孫鹿女悵
離羣停車立馬頻回首萬壑千巖空白雲

薊門凱歌

漢家邊防重東北爪牙虎豹攢關阨

天子登壇剖

玉符元戎受脤披金革細柳新頒戰士袍羽林爭射鞬

門戟秋高太白莽蕭蕭雲起旄頭風索索萬騎趨趨太

乙軍六韜決勝先天策刁斗聲喧殺氣腥銀鐙光寒秋

草白烏號對挽綠沈弓飛黃併逐連錢鐵營聯科斗夜

飛霜劍擁蓮花朝帶血胡虜憑陵候月生沸空鼙鼓雜

金鉦旌旗絡繹陰山暗炮火輝煌瀚海明關門忽閃嫖

姚將沙漠長驅韃靼兵天狼一射妖星滅海鯨遙掣塞

垣清頡利首傳丹鳳闕單于面縛白登城殺狐嶺上

烽烟斷一掃秋風古北平

殺作飛

明妃怨二首

蛾眉不可恃鴻翼竟難尋前殿更衣夕邊庭駐馬心春

悲胡地草秋憶漢宮砧縱使黃金賂其如妬忌深

十載未謁面椒庭空綺羅當辭纜一顧承恩豈在多詎

知薄命妾能使漢邊和千古琵琶曲流傳塞上歌

邯鄲才人嫁為廝養卒婦

邯鄲有才人嫁之廝養卒卒家得婦喜結我青絲髮繫

我錦羅襦解我凌風襪情知非等匹悲歡成日月昔為

匣中鏡今為水上筏風波一失所良媁信難越青蠅點

良璧明珠委深窟心折邯鄲城腸斷叢臺闕出涕望鄉

謝山人
邑川途間燕粵盈盈臺上女嫋嫋競超忽不曾處下流
安知問消歇

謝山人

名榛字茂秦號四溟山東臨清人正嘉間嘗遊燕晉間

、正月六日集李時明館得知字

明日又人日陰晴那可期清樽聊一醉白髮幾相知門巷雪仍在幽并春較遲漸看楊柳色鬱鬱亂鄉思

送謝武選少安犒師固原因還蜀會兄葬

天書蚤下發星軺二月關河凍欲消白首應憐班定遠黃金先賜霍嫖姚秦雲曉度三川水蜀道春隨萬里橋一對耶筒腸欲斷鵲鴿原上草蕭蕭

、晚夏天寧寺對雨同殷內翰正夫李比部于鱗賦諸天忽風雨蕭颯動山扉殿冷鴿逾靜鉢空龍未歸晚留軒冕客秋到薜蘿衣後夜懷支遁遙聽鐘磬微

李行人元樹宅同謝張二內翰話洞庭湖二首

詞客家何處西南是岳州地連湘樹斷湖共楚天浮極目風烟夕驚心鴻鴈秋君山更奇絕應待子長遊南望岳陽郡蒼茫吳楚分帆迴孤島樹樓出九江雲落日浪中沒秋風天外聞何時采蘋藻湖上弔湘君

、中秋無月同李子朱王元美李于鱗賦得城字

四野蒼茫雲霧生月華暗度鳳凰城雲間不辨銀河影

樓外空傳玉笛聲。鴻鴈清秋遊子意。梧桐白露故園情。
謝莊欲賦還惆悵。今夜關山何處明。

○寄金廣文

漢庭誰復憐才子。謫去長沙幾千里。三楚寒雲過鴈聲。
九疑秋色搖江水。騷人自古悲秋風。黃陵廟前斑竹叢。
惆悵湘靈杳何處。試聽瑤瑟月明中。

送陸秀才歸華亭

九月清霜下。三江白舫歸。芙蓉寒始發。鴻鴈暮還飛。
自許同張翰。誰憐滯陸機。讀書滄海上。燈火閉林扉。

送顧汝修歸上海

丹鳳城南楊柳疎。憐君獻賦此躊躇。帆飛淮浦聞初鴈。
路轉吳淞是舊廬。海上白雲秋不斷。天南明月夜何如。
只今一醉還分首。他日相思有報書。

隆慶道中有感

馬度黃雲塞。鵬飛白草原。兵戈連歲動。霜霰入秋繁。
農業千家廢。人烟幾處存。悲風起桑柘。過客重銷魂。

北征

朔氣犯征裘。旌懸大漠秋。亂山通驛道。殘日照邊樓。
白骨幾年戰。黃雲終古愁。夜來又烽火。驕虜寇并州。
終古作絕微佳

送李明府還仕安嶽

國朝卷十五
君去萬餘里春風賦幾篇猿聲江月墮馬首棧花懸路
入巴西樹山橫劍外天遙知訟堂靜還爲一鳴絃

步出帝城門

步出帝城門忽逢黃冠老借問欲何之終南拾瑤草丹
梯直上千紫氛石房深鎖三春雲乘龍仙客香不見海
上蓬山空自聞

宮詞二首

題畫

曉起下階芳草綠越羅昨夜裁春服試看海棠開幾枝
流鶯啼過黃金屋花落明年還復新玉顏對鏡堪愁人
寂寂簾櫳百花裏銀牀冰簟淨於水月明初照長信宮

太液池東片雲起禁門深鎖夜如何祗恐芭蕉風雨

送客遊洞庭湖

相逢楚客問巴州此去揚帆湖上遊天漢長連洞庭水
雲霞半入岳陽樓低空白鴈投寒渚隔浦丹楓照暮秋
莫向湘君聽鼓瑟黃陵月冷不勝愁

送楊伯玉歸涇陽

鳳凰城南楊柳絲當春裊裊牽別離古人折贈意偶爾
至今千里傳相思風吹柳花正西去黃鸝喚春春不住
落日關河悵遠人青絲白馬歸三秦壯年不嘆功名薄
獨將寶劍隨風塵有時大笑對樽酒七雄能戰不能守

燕昭之策非遠圖空使黃金高北斗君今落落誰見知
且向滄浪隨釣叟秋來水上烟雲重慎勿濯足驚魚龍
和王元美喜盧柟出獄

春從鄒律動近得破愁顏心事孤燈下年光萬死間賦
成餘白髮身在有青山共爾烟霞約飄然去不還

七夕留別汪伯陽李于鱗王元美得知字

久客言歸意留連幾故知鵲橋星度夜燕館月沈時天
上纔歡合人間又別離晴分絳河影秋動白榆枝桂醕
還成醉萍蹤不可期年年湖海上今夕定相思

俞山人

名允文字仲蔚崑山人隱于嘉隆間

新秋東郊遊曠

高齋散涼氣秋郊欣遐曠嶺赴遙波清雲響疎木日
入會田作荒蹊鉏鉤斲孤村生夕烟新苔入鳴犢歸來
無餘物山月亂簡牘

園居

窮居寡儔匹園廬有餘清落葉覆荒池疎林映高城野
田刈穫盡霜畦蔬復登寒月無密影中夜露氣凝是時
囂煩息沈思方入冥沈冥乃道真一悟還自驚

出塞

擊胡無生還此已非不知謂當棄一人所活千萬餘中

原有父母奮身靡敢私悠悠河陽橋生死從此辭

少林僧徒一百二十人赴義討賊軍次海上不屬
諸道帥聞而壯之遂賦此作

吾觀頭陀行髡髮窮山崖還收骨肉愛薰染熊羆牙柰
何懷憤激嘯叱騰洪波生犀全覆腦長矛左右義鳴弓
開寶月雄劍生蓮花據鞍大道傍四面咸咨嗟秘開九
地法義盡五天魔寧隨霍嫖姚未逐李輕車功成不足
多等世恒河沙由來俠烈肝可以棲楞伽

虎丘行

吳王墓前雙石壁翠水沈沈劍光赤香榆氤氳遶綠烟

玉潭閔謚浮青蓮生公說法開金偈猶自繁華昔遊地
今人繁華異昔時古人行樂今人悲古人今人不相識
徒使流鶯淚霑臆

征馬嘶送有光

白楊花飛江水黑江頭行人頭盡白青山日出烟塵昏
馬上誰爲都門客都門豪客長安兒蒲萄百斛柳千絲
戎裝玉駿邯鄲姬虎旗繡簇紅鴉啼長安三月春未暮
城中不見行人歸遊人歸醉滿堤青草長征馬嘶

胡笳曲

長風吹高海底月半落洮河色如雪胡笳寫出隴頭聲

千聲萬聲吹不歇此時都尉兵初盡此夕單于陣方結
沸地黃沙凍欲牢連天白草燒難熱玉筋啼還徧紅顏
坐相訣楊柳曲中離別久梅花管裏音書絕胡笳本是
從胡起曲曲綠雲咽流水飛入重城怨已深聽臨遙塞
愁應死誰知沙畔捲寒蘆一曲能消膽氣麤更使胡雛
雙淚落萬羣嘶月過飛狐

桃源行

武陵深深谿谷斜人家避秦多種花桃花無數映春發
片片還落秦人家地深反無猿狖生但見雞犬連桑麻
白雲飛來復飛去山裏人家幾家住當時捕魚何處歸

歸去還尋復何處始知人住深山裏世人遙望空雲樹

獨坐

獨坐高齋裏悠然向夕曛天空山勢出樹斷水光分遠
色看成靄輕陰隨度雲谷中人世隔麋鹿自爲羣

泉

能將映地復飛空冷色遙清石上松千載已無人洗耳
祗應流入亂山中

山行

遠樹高低不斷林半山落日半山陰白雲杳杳向空盡
一入松溪霧已深

送葉伯寅遊南都

朝日揚素景，零露泫盈條。歸鴈辭碣石，嗷嗷厲曾霄。念子遵舊都，整策陟巖椒。北眺窮朔垂，東瞻越江濤。崇雲象山岳，雙闕鬱岩堯。過彼雙闕間，冠蓋相遊遨。四節隨颺逝，茂時之嘉招。駿驥棄不收，踈足有餘驕。所期必鴻舉，齊轡羣龍朝。非子良見睠，豈復繫場苗。信心愜中賞，沈吟結清謠。共期玄冬月，歡談憩林巢。

艷曲

青樓綺閣大道傍，九微夜火明春牕。曲瓊流蘇挂曲房，彫屏匝匝玳瑁光。黃金錯枕牙作牀，博山爐熏沈水香。

美人絕世誰得當，蛾眉艷采爛明璫。玉釵刻雛雛九將，朱唇皓齒發蘭芳。密意細語安可詳，嬌深思溢樂未央。連枝錦結同心囊，織成合歡雙鴛鴦。如何翻飛限河梁，楚妃流歎盧女傷。蒲萄鏡前飛曉霜，青春婉婉羞夜長。相憐相恨遙相望，爲君直置相思腸。

王觀察

名世貞字元美號鳳洲太倉人嘉隆間官山西按察廉使

結客少年場行

驄馬下五連，錢流蘇障泥。瑪瑙鞭經過，五陵畔結客多少。年如澆之酒，傾肯惜突兀黃金若。山積散盡姓名都不問，肝膽但許英雄識。扶風夜深雪花白，手提人頭劔君

側爲君報讐身併擲細看乃是當時客君不見東家錢
刀坐朱紫魏其爲朝武安夕如此結交竟何益

上谷道中遇胡兒答

降胡何方來白馬戀懸椎寒霜腰鳴鏑宛轉疾於飛問
之不能言譯人爲致辭少小雲中住微命便如絲大荒
衝風發吹落樹頭枝十三行遇胡令牧青海羝二十娶
胡婦遂有兩胡兒有羊旣千足馬亦四百蹄橐駝載穹
廬水草去隨宜春漁條支渚秋獵祁連陲胡中無文法
貴賤不相欺肉酪富醇鮮所過皆若歸剽人長城裏忽
憶故所居父母猶在堂廬井未曾移抽矢射址方誓與

胡天辭幸蒙主將顧收作帳下師不知中原好但覺飲
食非炒菽調水漿醉飽永難期夜臥不得甘晝起不得
馳胡婦屬他人兩兒盼爺啼語罷吞聲咽愀然涕交頤
胡寧君臣分要在恤其私寄語諸邊將厚祿擬何爲

送袁抑之給事監兵北伐

雙垂韎韐繡瀾瀾金羈馬頭雪花白秋星乍稀承明廬
慷慨遺策長安陌城社已見狐鼠空關山要令豺狼辟
今爲頗牧出中禁豈但汲衛誇揖客飛書再看魯仲連
奏詔不數崔亭伯匈奴祭馬秋欲動連峯蔽天朔塞赤
六郡材官三十萬一一翹關柅金革期門募士身若飛

八國雅卷十五
屬國降胡鬣如磔此輩自昔稱英強見敵雖多慣跼蹐
時時大官出銀幣往往宿將甘巾幘嗚呼 主上恩不
薄忍使驕虜猶充斥君行帥府青天高揮檄霜寒淨沙
磧安得一騎馳王庭爲君預掃燕然石

游俠篇

側坐犁眉騮雙牽短尾刀豪鷹逐呼來萬里天風驕平
蕪如裊楊柳綠新豐酒美兔肩熟白日銜山不肯歸醉
擁胡姬野中宿歸來唾謂文成侯汝曹爨下不自羞斗
大黃金何足問獨身西斷郅支頭

題十八學士春宴圖

梁園碧筠瀟湘玉小山叢枝綴金粟天公驅龍糝秦土
移入秦王天策府虬髯主人馬上客手搗中原血華赤
芸氛霏霏講初罷獅子驄頭散鞭啞軟羅半臂春風偏
十八奚駒嘶紫烟玉酥宮痕織月甲銀甕戈書小黃押
大槽亂拍珍珠流葡萄就暖沈香蚪琵琶掩瑰鷓雞促
聲聲破陣秦王曲羲輪半春啓明曜萊公起舞密公笑
就中小薛醉隗俄龍門老師柰若何太子宫前演雞戟
銅馬時時嚙荆棘諸君詰朝且虛左雋州流人來上坐
弔故李平廣

聞道匈奴騎猶驚飛將鋒馬蹄終自老猿臂欲誰封得

一中原重無雙異代容長令草間鏘霜色滿盧龍

青州雜感

國難孤誰共天驕晚未擒九重垂北顧萬死障南侵
忽下明光詔多分少府金汝曹須戮力今日主恩深

重過張太學因贈

憶昨丁年客逢君子夜長葡萄濃不瀉瓊樹儼分行
別思花如霞歸途月似霜重來漸蕭索塵滿信陵牀

贈明竺上人

竺師震旦秀天骨何昂藏一雨萬流合斜陽千嶺蒼
坐來楊枝水忽發梅檀香擬問西方路人天並杳茫

和許解元悼妾二首

十五繡鴛鴦粧成贈阮郎蛾眉西嶺月鸞鏡九秋霜
小雨流酥暗蘭風錦箏涼欲從天外覓誰遣返覓香
雲鬢白玉酥人道勝羅敷所念前魚泣寧知別鶴孤
同心悞綵綫如意妬珊瑚往日西陵栢蕭蕭長夜徂

憶昔

憶昔南巡漢武皇樓船車馬鬱相望輕裘鄠杜張公子
挾瑟邯鄲呂氏倡秋淨旌旗營細柳夜深烽火獵長楊
孤臣亦有遺弓淚不見當時折檻郎

送瞿太史使大梁周府

長安草色上鳴珂，繁吹春調四牡歌。太史授圭開赤社，宗藩如帶指黃河。花間漢使樓船發，雪後梁園鴻鴈多。上客知君頻授簡，鄒枚詞賦未應過。

醉題書齋

束書斗酒安吾齋，西風爲掃當門柴。卽寒薜衣時護几，未貧苔錢欲上階。一丁世自饒紫綬，二酉吾敢勞青鞋。已無故人車馬跡，賴有明月時投懷。

送蔡子木守衡州

少年爲郡肅清修，京洛相携賦壯遊。一去蔡邕誰倒屣，
可堪王粲獨登樓。插天衡嶽層層碧，遶郭湘江細細流。

莫向秋風悲日遠，長沙今得比中州。

過天寧寺望塔有作

浮圖隋寶額，舍利漢金人。龜捧雲扶篆，龍蟠海藏鱗。躡空依日月，飛界隔風塵。縹緲遙疑幻，峻嶒近復真。霞標象外矗，玉樹望中新。萬劫留真相，諸天護法輪。空憐證聖眼，猶是滯凡身。倘有摩尼在，春風一問津。

爲謝山人贈顧生

游客爭歸趙，虞卿亦見尋。立談雙白壁，笑却千黃金。解道國恩重，誰同交誼深。崎嶇依一老，流落見餘心。擊筑無燕市，悲歌有越吟。揖予還拂袖，碣石暮雲沈。

塔光

天寧寺塔中有舍利時時於相輪吐光予夜宿見之

飛刹聳岩堯迴風萬鐸敲神光發寶樹定力轉金標熠
耀渾難擬熹微迴不消晦驚春月上昏憶曙星搖法鴈
珠頻吐神龍燭乍飄一鐙披幻劫萬界出沈寥自失迷
津晚俄然覺路超不須求指示淨域本非遙

飲歐陽鎮朔卽事有贈二首

旌旗春偃白龍堆教客休停鸚鵡杯歌舞未殘飛騎出
月中生縛左賢來

胡纓白馬下雙鷗降虜轅門氣不驕爲問渾邪能騎射
可如新帥霍嫫姚

賦得雙塔寺

白馬西隨漢使回招提對聳古燕臺靡空日月金輪轉
分界河山寶樹開法鴈影從天外合燭龍光並夜深來
紺牙青髮同歸化朱網丹楹總劫灰

履魏三日受筴易州行府承諸公會高臺有作

秋聲忽傍羽書寒易水蕭條鴈影殘今日和戎無魏絳
當時結俠有燕丹府僚高宴從軍樂客子悲歌行路難
莫向舊臺稱買駿倦游無計可辭官

于鱗邀登郡樓分韻得秋字

使君杯酒一登樓倚檻蕭條木葉愁不盡天風吹大陸

何來嶽色滿邢州匣中星動雙龍夜柝裏寒生萬馬秋
爲問郡曹諸記室幾人能並李膺遊

山西丈夫化爲女子

萬事反覆那足齒山西男兒作女子朝生暮死不自知
雌伏雄飛定誰是謝豹曾聞受朝謁於菟亦解談名理
渭南巾幗不可呼此曹變化無時無只今齷齪不能去
羞向人間喚丈夫

廣陵訪公瑕不遇云自儀真失之

豪華自古讓維揚一水橫江卽異鄉二十四橋歌吹徧
不知何處覓周郎

王儀部

名世懋字敬美號麟洲太倉人嘉隆間官儀部員外郎

懷助甫

司封年少張公子裘馬翩翩氣色新豈謂文章偏逐客
更令湖海見孤臣停騶對飲南冠日擊筑酣歌燕市春
伏枕思君重流涕于今國士有何人

遊惠山酌泉次唐人韻

舍舟登蘿逕停策憩松樾乳竇何泠泠臨流歎幽絕寺
古行跡稀苔深石文滅雙鳧擁春雲百壺倒山月歡餘
會有歸顧景不得發狗此丘園姿願屏塵世轍

寄題于鱗白雪樓

青山上築傍松筠。此日南樓屬興頻。地敞風雲懸自合，
天橫海嶽望常新。尊前色借齊宮曉，賦裏聲回梁苑春。
莫恠鹿門長謝客，未堪雙眼向巴人。

同徐子與諸君過顧司寇箬翁山樓分韻

卜築秋高萬壑陰。空山白髮著書深。長松老作虬龍態，
古磴閒從薜荔侵。西望吳門縈匹練，東迴箬水寫鳴琴。
開樽復借儒生色，倒屣誰酬國士心。

態作
優佳

橫塘春汎

吳姬小館碧紗牕。十里飛花點玉缸。蠟屐去尋芳草路，
青絲留醉木蘭艤。山連暮靄迷前浦，雲擁春流入遠江。

棹裏長干聽一曲。烟波起處白鷗雙。

偶過無錫遊漆塘山分韻得客字

尋山涉逶迤。撫景窮旦夕。遊目翠微巔。巨麗生咫尺。遠
近標羣峯。東南淪大澤。山高日浮紫。水闊氣生白。莽蒼
千古懷。沈冥萬象色。悠然命樽酒。一醉滄洲客。放曠湖
山間。吾生付雙屐。

初春雨中集俞元海飲同諸君分韻得田字

清樽落日帝城邊。一曲長干醉裏傳。柳色暗歸春酒
綠。雨聲寒並夜燈懸。爲郎也自稱蘭省。有婦從他笑秣
田。莫恠入門須盡興。相逢何處不堪憐。

送張比部守思恩

西曹執法張廷尉，五馬翩翩出舊都。
青草瘴消過八桂，碧雲看盡隔蒼梧。
負鹽徭女驚持節，椎髻蠻官屬剖符。
聖代只今多慮遠，白狼歌舞莫教無。

三山行送胡年丈守南徐

君不見海門東開大江走，雪嚙霜吞巨靈吼。
奔流繞出南徐州，鐵甕回看大如斗。
誰令此地爲雄鎮，天遣三山縮其口。
我昔挂帆揚子渡，三山岸巒爭雄據。
疑是秦皇驅片石，擘作金焦兩天柱。
正看北固臨江岸，旁睨兩山如指顧。
奇峯陡嶂相望開，丹樓如霞綺色來。
長松百尺

蓋金刹一一倒插江流迴，恍如鼇身欲浮動。
定是鼎足支傾摧，吁嗟三山麗何極。
地主今歸釣鰲客，潘侯去矣胡侯來。
五馬都餘舊驄色，至今霜氣臨江寒。
突兀平添萬峯碧，丈夫一郡豈足難。
君其更理三山屐，半醉狂呼萬籟鳴。
歸來高臥郡齋清，北固金焦白雲起。
片片送入江流聲，爾時定草三山賦。
得不叫絕思王生，叫絕思王生。

集馴象公署喜黎惟敬中秘周公瑕徵君初至并
送陳仁甫太史奉使楚藩即席分韻得行字

入洛翩翩自盛名，況逢詞客送將行。
雙龍夜識雲間氣

一曲朝分郢上聲。舊雨忽成今雨別。客星應逐使星明。
當樽慷慨休辭醉。容易天涯是鳳城。

卽事戲呈楊祠部

苑樹宮槐連大堤。誰家紫騮燕市西。道旁荆卿嘿逃去。
屠狗擊筑還相携。目光自可付牛背。身計應難學馬蹄。
共道拂衣明日事。那能今夜不如泥。

又用子念樓字韻

苑邊新築傍宮樓。郭外飛泉接御溝。岸幘何來俱傲吏。
銜杯自信有滄洲。四時白紵歌偏夏。一水清蘋坐欲秋。
寂寞風流建安事。芙蓉池上更成遊。

遊碧雲寺

布金聞此地。功德冠招提。絕壑懸相抱。飛泉巧自移。雲
根穿卓錫。虹影落梁。恩靈鷲標層。構文螭護賜。碑。鴿。馴。
多寶塔。魚老放生池。法雨疑晴墮。香花欲晝垂。天應愁
罔象。月似避摩尼。酌醴楊枝潤。函經貝葉披。人天依梵
淨。佛日度春遲。妙境身西竺。清心首大悲。興來成再宿。
塵界一相遺。

聞王百穀至却贈

百穀受故相袁公知。每有羊曇之慟。重來京師。意多感慨。

燕臺蕭颯下冥鴻。客散平津夜月空。匣得隋珠還作淚。
掛來徐劔已成虹。風塵暗失西州路。氣色重開碣石宮。

寶瑟自珍矜不奏問君竿調可兼工

始謁選與家兄別

雙鴻戾高旻翩翩整脩翮何意衝颺舉吹我墮空澤羽
毛一何摧形影深自匿幸逢天休明得遠彈與射喑噤
兼行間矚睽一以適豈伊雲霄望遂乖雙飛翼行者畏
尉羅處者戀磐石躑躅不能前顧影自銜恤會當遵故
渚天路安可極弱齡無外志頗願營東山際會諧哲兄
十載共憂患弓旌豈獨枉微尚遂不堅冠蓋羅前庭循
已中自憐干將匣其銛顧謂鉛刀前珪璋薦清廟束帛
賁丘園在物苟失宜所得恐兩捐含辛卽長路恨恨不

能言

先君復職命下志喜

白沈幽谷痛誰照死灰明烏烏悲新疏麒麟憶舊名
竟消招乍返淚盡感重生試問王哀樹春風可再榮

送姚祠部擢參楚藩二首

承明清夢隔天涯十載還尋江上槎自是詞臣思白雪
非關才子去長沙

春風畫省謫仙居樸被曾沾醉墨餘別後倘憐同舍在
衡陽歸鴈武昌魚

人日袁考功見過留酌小牕前酒酣放歌却贈

今年人日百不娛客遊金陵家在吳金陵春事亦不薄
有官何似當年無清溪館前日欲晡誰其過我袁大夫
喜是舊日高陽徒十千斗酒不用沽牀頭春甕足百壺
春盤未倒綠牕莫春陰滿地雲模糊渡口桃花未着葉
門前楊柳難藏烏金陵少年紫驪駒有酒只過秦羅敷
那知晚晚日易徂三十之年一再過二毛便欲侵頭顱
男兒纔挂馬曹笏河山已隔黃公壚仰天且莫歌嗚嗚
樽中酒盡可復呼霜落烏啼更明日摧眉還向府中趨

黃文學

名姬水字淳父號質山長洲人邑庠生

廿二日史叔載冰壺館

過爾林居僻雲霞一逕通形驅百年內心賞幾人同日
晚花房合秋深鴈壘空物華閒玩久不覺夕陽紅

荅皇甫百泉惠寄

阮籍羈愁日相逢俱異鄉栢梁新藻惠省柱舊題荒客
淚天涯盡禪房秋草長不須悲失路憎達是文章

贈荅皇甫司勳

投紱歸來日遙從瘴嶺馳舟輕應載石囊富爲緘詩薄
俗芳蘭忌長途倦馬悲無嗟霄漢遠自有白雲期

人日集章憲副道華第

訪君携策過城闔雪後青山映綠筠居似晏平甘湫隘

襟同逸少任清真葡萄新釀春爲酒花柳初年日是人
痛飲狂歌此生事莫言窮達共沈淪

南都逢金子坤

豈因貧賤事干謁閉戶著書無斗糧猶耻王孫一飯惠
未忘俠烈五陵狂黃金散盡留顏色白髮悲來歌慨慷
相對秋風都市酒青天不語泣干將

虎丘送童子鳴還太末

送別登臨祗自嗟由來此地恨繁華吳王伯骨埋青草
越客心尤對落花雲度前溪飛片雨日沈高閣挂殘霞
柯山每憶尋仙迹便欲同乘穀水槎

偶成

巖下悠然與世違試看郢北墓空嘆首陽薇西
日鳥初沒東流花正飛無人知苦調霜月照金徽

落梅

昨日看花花影重重來惆悵幾枝空隨萍半積芳池上
學絮全飄畫閣東秦隴迢遙悲夜月漢宮憔悴怯春風
臨觴莫恨凋零盡留得隣家玉笛中

題樂玄子清嬾窩

高人非習懶世事本無營偶自同嵇夜聊爲學長卿水
邊宜竹性岫裏識雲情惟有北窻卧頽然老此生

始發吳至都下述懷

迴波戀舊渚歸雲依故山北風與南枝矯性物所難胡
爲背鄉邑杖杜多慨嘆親朋盡一別不復奉容顏去間
如昨日青林忽成丹搖搖羈旅心夷猶卽憺煩臨睨悵
脩阻江芷嚴霜殘但傷行路苦未暇憂饑寒前除爛河
宿濡袂涕洟瀾

飲永寧寺

與金子坤姚元白陳子野盛仲交余伯
祥何元朗陳九臯吳子克周公瑕同集

青樓歇馬拂吳鉤萍聚天涯共白頭
久舍新豐惟命酒長謠故國一登樓
林殘半壑飛寒雨潮落空江急暮流
世路風煙悲去住莫辭此日醉筵篋

郊居

空谷堪栖遁嗒然無所營
水禽聞夜啜山木玩冬榮
人世蕉鹿夢吾生蓬累行
綠尊情所適不爲飲留名

沈嘉則過訪遲魏季朗不至

吳宮一草堂蘿竹逕全荒
呂駕遙相命嵇琴靜以張
雲移峯駐影花落樹留香
綠酒懷人處空除半夕陽

阮魯蔣三都闔携酒過訪得朝字

麗景初移候朱明乍履朝
竹晴全解籜花晚半辭條
揚子耽玄默龐公受寂寥
薜蘿情自洽誰識有金貂
送王元美敬美遊洞

逸思超雲上殊庭邈域中銀房靈草翳石几素書空羽
駕攀非遠霞鑣悵未同千年闕神秀奮藻待與公

張吏部助甫過訪同賦林字

荒塗今始一開林排藿高軒喜過尋羣鳥不飛池上酌
片雲忽墮竹間琴會稽合竄梁鴻跡湘水元知賈誼心
剪燭渾忘語申旦西窻寒漏夜沈沈

國雅卷之十五

國雅卷之十六

勾吳顧起綸玄言選

張中丞

名佳胤字肖甫號岵峽四川銅梁人嘉隆間官都御史

大江行

白雪去廣陵徘徊竚江汜海霞歛東升色射鯨波紫臨
流頰長江大半三巴水一自辭岵峽滔滔數千里何時
復西歸傷哉遠遊子

冬夜飲黎惟敬賦仙人騎白鹿圖

黎君大隱金門吏犢鼻相過見豪致當壚不惜鷓鴣裘
雪夜呼盧坐燕肆堂懸毫素赤霞生四壁氤氳起空翠

中有仙人芳玉顏笑把如意揮青山驅馳白鹿凌玄圃
靈巖珠澗非人間古藤垂盡蒼松黑孤洞窈杳碧雲入
來往青冥何處尋元氣淋漓萬峯濕樹色長隨座上流
欲將鴻寶問丹丘七星未厭蘇耽與四駕難逢李耳遊
此畫飄飄誰作者云是東吳戴生寫沈淪異代同幽期
黎君好之意瀟灑聞君久作羅浮賓余家亦是青城人
按圖不覺氣飛動胡爲騎馬行風塵君不見滄洲神物
千年來空春上苑稱蓬萊白環使者無人見與尔且醉
黃金臺

大石行寄崇原王子

黃河水應星漢星漢傍白石爛河伯神告天帝博望死
君平逝此石空纍纍誰遺向人世世上中條似崑崙盈
盈東走靈河源精光磅礴幾萬載崛起異人稱天孫天
孫者誰是自號大石子抗志超沈冥朱門厭羅綺平生
不作硜硜流補天礪齒騎蒼虬棄楂取得支機物置之
幽谷成丹丘函關前龍門後砥柱左仙掌右千巖萬壑
鬱相望石髮天風吹更長赤氣鞭笞滄海血青山叱咤
金華牟有時挂雙舄還訪赤城迹島上鰲簪亦彈九江
中灑灑如卷石石乎石乎象昆吾霞標壁立雲模糊美
人許寄真形圖側身西望增煩吁

三石篇

大滇以西三巨石錯列荆榛對孤驛文彩天開海嶽圖
面面晶光盈十尺吁嗟此石生黠蒼云誰置之古路傍
停車顧盼日將晏僕夫語罷泣數行往年天子新明
堂厥材萬國爭梯航燕山之石白勝玉何求此物勞要
荒守臣當日功名亟檄書夜飛人屏息程途初不計山
谿男婦徵徧無漢棘鞭石難尋渤海神鑿山誰是金牛
力邪許終朝尺寸移積屍道上紛如織中興令主堯
舜姿一葦聖德超茅茨皇上曾有一天門萬里竟不知
葦可居之諭幾使黔南無孑遺君不見旅葵古訓老臣策蒞醬雖甘
亦何益三石砢砢風雨深千載行人增歎惜

烏蠻灘

烏蠻灘前石齒齒盤渦轉地驚濤起險絕空傳灑頰堆
估客帆檣愁欲死萬里江源異域來右出夜郎左交趾
青天赤日雲四垂跼跼飛鳶墮深水我本西梁遠道人
瘴鄉奔逐胡爲爾停舟一奠伏波祠丹荔黃蕉前致詞
英雄心事無今古神物風雲各有時銅柱功名儻難就
澤車款段隨所之

宿阿水驛

漸入殊方俗荒山偶一亭晚庖行紫蕨孤壁起明星雪

片春猶見猿聲醉懶聽客居初不陋及此問夷經

再訊振卿

病卽經旬卧愁應絕域增坐令青桂侶如對白雲層露
氣思仙掌霜風下茂陵霍然君有意七發愧枚乘

席上聽何振卿談大理山水

衣裾蒼洱色得意總看君蠟屐西南盡天雞日夜聞杯
前流海氣舌上起峯雲便擬邀名去翩翩入紫氛

秋夜汎舟東溪

吾家山水地對此卽依然觴政甘浮白談鋒敵太玄一
鐘何處寺片月滿谿船只恐迷煙霧乘槎牛斗邊

答教子學山人

雙鴈題書過汝墳裁詩直向謫仙聞別來石洞生朱草
夢裏江山長白雲開口猶存三寸舌寄形應著五遊文
古今木石俱高士世事紛紛始信君

行役新蔡張助甫吏部夜過分賦

去國何如楚大夫沈冥儘可托江湖雲霄轉覺黃金貴
世路深知白雪孤蜀道峯陰堪叱馭梁園竹色趨呼盧
銅陂不讓蓬池會我輩他年亦酒徒

談天碣石憶當時落日中原有所思然諾千金看意氣
結交雙劍並雄雌途窮詞賦青雲薄世變功名白髮欺

諸子凋零君自見存亡何處不堪悲

夜投草涼留寄漢中分守廿五

棧雲寒滿黑貂裘虎豹關長使者愁西嚮青天懸蜀道
東來白雪擁吳鉤猿聲一夜清霜阪月色千峯古戍樓
獨坐空山正無賴居然江漢想風流

瀾滄橋

疊嶺遙知萬鳥愁蘭津西渡赤虹浮鼉鼉駕浪聲齊動
烏鵲飛梁影並收纜束長江標絕壁天懸雙屐蹴中流
當時漢卒勞歌地鞭石於今作壯遊

謝山人自潞州以詩見寄答之

魏臺春望接中原揮塵猶思鄴下論地盡大行天
家仍漳水席爲門交遊海內名誰得賓客淮南道自貧
彩筆近看垂老健由他竹雪滿菟園

答睢陽李子中

碭山佳氣傍幽居四壁猶懸舊賜車玄室逢迎多問字
青雲消息付徵書浮生尊酒隨蓬澤落日漁樵托孟諸
幾上平臺懷賦客倦游吾已似相如

洪山人從周自燕京訪余黃寺山中喜而有作

搢頤山色案頭看木葉空齋雨後丹命駕客傳千里至
逢人秋共一尊寒秦烏白首終難料馮鉞高歌不爲彈

躡屩蚤能從吏隱京塵邈上鹿皮冠

張掖使院中懷吳高州明卿

居延客舍虜塵間南去冥鴻不可攀
海上有人生白髮郡中無事對青山
積薪世態休相問隨牒功名且未還
落日思君俱異域何年得望玉門關

登函關城樓

樓上春雲雉堞齊秦川芳草共萋萋
聲知雨後河流急青入窻中華嶽低
客久獨憑三尺劍時清何用一丸泥
登高眺極鄉心起關樹重遮萬嶺西

秋夜飲許後谷少谷昆玉宅

入關虛說異人來愛客頻將綺宴開
繫馬秋臨玄度宅登堂花發季膺盃
城高急雨驚傳柝曲罷西風起落梅
連日盡遊冠蓋里揆天誰似二龍才

寄吳化卿侍御

一麾長傍大河潯裘上風霜歲月深
世俗交情仍貴賤書郵今日感浮沈
三秋喬嶽愁中賦萬里寒江病後心
夙昔酒徒燕市裏相思聊代白頭吟

寄答王元美

黔南爲客伴雕題絕國千峯瘴易迷
塞草愁時看欲盡夷經行處舊曾携
登樓暇日歌朱鳳隱几清秋頰碧雞

莫道故人千氣象
投身仍過夜郎西

寄徐子與

當年鉛槧此提携
萬里懷人見舊題
鄴下應徐諸客散
滇中王馬大名齊
南遷曾否騎黃鶴
寄遠憑誰到碧雞
近日詞臣收欲盡
憐君猶滯夜郎西

遊金山

青擁芙蓉夾岸浮
躋攀更上最高樓
波分島嶼蛟人室
風散帆檣估客舟
遠近日銜滄海色
東南天豁大江流
舉觴萬頃真堪濫
氣盖勾吳百二州

擬登焦山會風浪不果

孤峯東插海門青
眼底煙波動杳冥
不爲雄風翻巨浸
好將片席破滄溟
江天虛擬磨巖賦
石壁誰探瘞鶴銘
自是勝遊難並得
豈應詞客妬山靈

宿太華山寺

焚香高卧太華煙
鶴唳松濤夜不眠
欲識此中無住著
海心月在白雲天

華陰送李道士

高秋明月照秦山
東去浮雲不可攀
已遣天風吹紫氣
爲余相送過函關

夜過朱僉憲省署

深秋門掩玉繩低
鴻鴈天風過碧雞
曾是一二京題柱客
如何同到夜郎西

時事相逢一拊膺
虛堂蟲語亂秋燈
鄉心共寄昆明水
下盡巴渝更秣陵

徐兵憲

名中行字子與號龍灣長興嘉隆間官福建兵備副使

蚤春雪後黎維敬姚元白過余館得中字

臘盡春迴薊苑東
空庭繫馬醉新豐
雪晴佳氣浮天上
風暖流澌出禁中
劍珮十年違伏枕
烽煙千里滯歸鴻
遲回欲獻甘泉賦
詞客于今滿漢宮

奉送尊師白石韋先生德州掌教

九河水泮散流澌
千里春雲照鬢絲
魯國世推韋氏學
廣川仍下董生幃
稍增微祿堪沽酒
依舊清齋不廢詩
故里侯芭逾寂寞
守玄應不負吾師

黃希尹自維揚移貳永嘉適吳志道往謁賦寄

搏風一日徙南鵬
破浪扁舟出廣陵
鴈蕩東臨滄海盡
射堂秋倚白雲層
謝公篇翰存丘壑
黃霸功名起郡丞
爭道龍門能下士
可容文舉一先登
追于鱗不及道
遇元美賦此

同舟向自期元禮
乘興還能逐子猷
萬事易從交臂失
千秋難得比肩遊
倚歌霄漢雙星動
悵望關門紫氣浮

倘過平原俱會合何方十日爲淹留

。過歐廣文首菑齋

首菑齋清海月懸桂枝新發蚤秋天小山自喜留詞客
微祿猶堪給酒錢雙劍並緣歐冶出孤琴曾是廣陵傳
相逢片語能蠲疾不俟觀濤已霍然

送張五嶽游武夷

縈迴一棹入千山梵刹琳宮杳靄間三十六峯秋色滿
不知何處弄潺湲

罷郡喜歸

十載思丘壑今朝得杖藜挂冠嵩岳頂鼓枻五湖西芳

草春將編桃花並不迷吳興清遠地不讓武陵谿

張肖甫自湘守遷中都兵憲喜寄

西來車騎出轅轅獨領兵符護寢園地抱金陵雄上國
天連汝潁控中原登臺秋色催詞賦開府青山對酒尊
淪落張華君莫笑驚人龍劍定酬恩

送陳督學之廣右

曉來驄馬出嚴城南去梅花滿驛亭玄草舊傳揚執戟
蒼梧重見漢明經霜清瘴海千山出日落夷歌幾處聽
共道炎荒文教洽空勞銅柱倚青冥

遊荆溪張公洞

迢迢樓岫倚高天百尺危梯入紫煙赤日洞門吹積雪
青雲樹杪挂飛泉潮生壑底三江應霞起壺中五嶽懸
一自仙翁冲舉後黃金大藥有誰傳

王元美使雲中時李于鱗在秦

風塵大漠擁登壇明月雙鉤出塞看天落黃河蟠廣武
書飛白日走呼韓葡萄夜醉千山色首宿秋嘶萬馬寒
此去李君堪極目關門紫氣滿長安

驛亭漫興

走馬章臺春欲殘空亭載酒共憑欄雲垂平野青天濶
風起滄江白日寒寂寞園林逢客少浮沈朝省和歌難

江南豈乏登臨地却笑紅塵未挂冠

秋日同王元美兄弟遊顧司寇西郊別墅

僊臺寥廓白雲間詠傳歸來此閉關
下著書深紫氣
窻中飛瀑滿青山薜蘿秋老堪裁服
松栢年多好駐顏
不是主人開閣待高天日落詎能還

過關索嶺醉後解嘲

昆明使者漢張騫六詔仍逢武帝年
萬里尚期車徹徧
千山寧厭馬蹄穿銅標日月雙橫海
鍊石西南一補天
不腆彩毫猶五色銘成應許並燕然

盤江驛舍阻雨寄門人汪維

天連益部常多雨路出盤江况毒淫春蚤蟄龍蒸赤水
夜深山鬼嘯青林誰憐道遠妻奴累實恐年衰瘴癘侵
吹笛哀生應好在懷余堪和武溪吟

盤江雨霽

亂雲飛索嶺片雨散盤江天擁金城百星搖寶劍雙山
橫青玉案水漾碧油幢喻蜀高文在雄心未可降

清溪洞

洞自鴻濛有巖疑霹靂開磬懸虛地肺標起插天台紺
碧空中相金銀海上臺虹梁浮綠水蘿薜繡蒼苔有客
尋真氣無僧辯劫灰霞扉朝日月雲壑悶風雷秉炬羣

靈見銜杯萬象迴休養應此地車騎謗相催

吳學憲

名國倫字明卿號川樓湖廣興國
州人嘉隆間官貴州提學副使

醉中荅子深月夜見懷

對月君能賦看雲我獨眠一尊違咫尺萬戶落嬋娟徒
倚青藜杖蕭條綠綺絃平生任飄泊寧與衆人憐

元美兵備青州寄懷

聞道燕南使提兵北海來未妨戎馬地况亦佩刀才岱
岳仍奇觀琅琊自古臺橫戈一以眺秋色不勝哀

病中喜仲兄至

急難誰堪藉題書淚未休異鄉遷客病一日九江舟不

待能分痛相逢忽破愁歸耕何處可款款爲余謀

寄元美塞上

王郎別我未銷魂六傳飛揚出薊門鼓角秋聲迴地軸
佩刀寒色照天闈馬肥苜蓿黃金勒客醉蒲萄白玉尊
回首中原風雨過不知揮涕向誰論

黃鶴樓

黃鶴僊人去不回漢家樓閣自崔嵬千帆雨色當窻過
萬里江聲入坐來雲夢天低湘女怨洞庭葉下楚臣哀
西風何處聞長笛亂落梅花到酒杯

過邢州留別于鱗

阮籍窮途哭漸遙未妨尊酒故人招文章豈自諳時命
放逐真成負聖朝落日佩刀迴黯淡秋風團扇掩蕭條
蒼茫後會兵戈裏不待臨岐覓已消

鄱陽湖

欲向匡廬卧白雲宮亭水色晝氤氳千山日射魚龍窟
萬里霜寒鴈鷺羣浪擁帆檣天際亂星蟠吳楚鏡中分
東南歲暮仍鼙鼓莫遣孤舟逐客聞

雪浪閣題贈羅太史

百尺春江數仞峯巖扉蕭索暝雲重濤翻白雪凌孤閣
石吐玄泉落萬松抱璞荆山寒自照乘桴滄海暮誰從

如何漢帝中興日尚使人間有卧龍

哭宗子相

萬里招魂君豈知天風嗚咽楚人詞寒雲洛浦歸任昉
歲晏濠梁憶惠施雙淚把詩還字字一樽傷往獨時時
由來腐骨無今昔宿草寧嫌酹墓遲

贈別王元美

五鳳城南春可憐千山花色擁離筵自從白壁稱知己
未向黃金問少年把劍長虹燕地拆停尊落日薊門懸
君今匹馬中原去前路何人解執鞭

梁比部

名有譽字公實號蘭汀居嘉靖中官刑部主事

秋懷

空庭木葉下薤簾新涼歸織絺屏秋筇綸縞授寒衣火
流桂將歇霜至蕙已微信矣感物化願言捐塵機流塵
生綺疏懷疴卧虛帷引睇碧雲盡攬茲明月輝賞心非
徒然悠悠寄金徽

送傅山人遊羅浮

僊山矗遐嶠緼奇信靈造晡靄躡重溟巍我冠穹昊陰
室引陽輝霧谷通霞島玄溜澤難枯炎林藥還蚤故鼎
無留丹煑石有遺老神境誰能躋玄蹤爾方討秘檢洞
中尋塵踪雲外掃陟霄舉若華憑崖掇朱草吹萬固不

同得一以爲好。唾彼蟬蛸士，夸毘喪其寶。何當策茅龍，吸景滌幽抱。

送傅木虛返閩中

遠遊返舊山，武夷何嶮峻。鑿戶印壁峭，塞藥歷竇深。浮雲足擬志，澄淵可比心。誰言鮮歡娛，丘中有鳴琴。誰言巖處劬，桂樹有清陰。玉茹共晨餐，祥風披夕襟。隴泉多異脉，谷鳥多殊音。嗟哉還山人，冲夷難具尋。斑麟倘可馭，遲爾羅浮岑。

送皇甫司勳謫開州

重淵產明璣，玄圃蘊奇璞。君子抗高諛，信矣邁前躅。摘辭燦國華，矯迹荐朝祿。淒風倏以飄，江海變涼燠。空抱長沙悲，誰知郢人曲。茲焉摠柔轡，謁帝際明淑。魏闕承嘉惠，漢畿行佐牧。我有盈樽酒，將子眺平陸。亭皋雲漸緜，河橋草猶綠。客塗履澶淵，臨流想濠濮。紆組嘆徒勞，川原曠英矚。鄒枚列彤庭，班揚侍華轂。滄滯非所嗟，宣室行當復。辰哉不可違，清徽幸自勗。

酬同年陳子憲卿

陳琳才莫敵，投我郢中吟。客舍悠然獨，披玩能使清。風吹我襟陳，君本是南嶽。奇連城，照乘重當時。筆間解掃煙，雲氣海宇爭。看鸞鳳姿，古來楚國多豪彥。風流文藻

生光炫景差宋玉已寂寞崔什羅含俱不見事往無嗟
作者非只今又識陳君面十載讀書雲夢潯一朝獻賦
金華殿 天子臨軒賜顏色詞場投筆齊嗟羨登龍君
已擅芳名附驥予慙接歡宴懽宴相過 帝苑東長條
短條花藥紅綵毫夜賦攬瑜月錦勒朝嘲楊柳風與君
相逢恨不蚤握手相看卽傾倒題詩正值好春時論交
况復長安道綠綺那能聆妙音青尊且共開懷抱許身
稷契何慷慨努力班揚看揮掃梁棟須爲大厦求珪璋
終作明堂寶我本煙波漁釣儔一出風塵空浪遊東山
高卧敢自許北闕上書今見收結廬夢憶山中桂采藥
心懸江上洲戀闕思親情共切忽誦清詞消我愁如君
高謔古無有瀝膽披心憐獨厚嗟我虛拋竹籜冠看君
蚤曳桃花綬青霄比翼昔同欽黃金結交世應醜人生
會合自有時按劍當年悲白首芳草淒淒春已過送春
更有新詩否

秋堂夜集聽雨

岸幘坐清夜冥冥山雨過微涼生密竹急響亂衰荷卽
事易成感會心寧在多少不須憐骯髒客醉且狂歌

歲暮集黎惟仁紫芝山房

雲木自蕭疎何慙大隱居雨殘三徑菊塵滿一牀書開

戶鳥聲過移尊竹色虛。滄江復歲晏，誰念病相如。

賦得臨池柳

拂岸青陰合，縈堤翠色稠。聲從笛裏聽，影傍鏡中浮。水與柔情漾，波將舞態留。腰肢憐楚細，眉黛學孫愁。濯濯恒籠霧，依依詎耐秋。堪憐張緒去，誰復擬風流。

吳宮

月墮平湖漫不流，煙波何處可消愁。千年人傍要離塚，百頃誰尋范蠡舟。廊下悲風聞響屨，堂前清宴憶傳籌。竹枝似寫當年恨，聲起吳江葉葉秋。

姑蘇懷古

看山幾日到吳中，遊客登臨感慨同。金虎跡荒靈氣滅，水犀軍散霸圖空。春歸茂苑烏啼月，花落橫塘蝶怨風。誰識倦遊心獨苦，扁舟長憶五湖東。

秋日遊蒲澗贈丁戊山人

紫巖曲曲隱晴天，萬壑涼生珠箔前。訪古時攀偃蹇樹，談虛獨飲清泠泉。跡緣遁世尋三秀，心爲逃名得四禪。一自白雲飛去後，到來應是幾千年。

送同年施欽甫宰蕭山

羨君墨綬去翩翩，茂邑風流此日傳。綠樹人家漁浦外，白雲官舍鳳山前。琴彈單父庭稀訟，花發河陽賦幾篇。

共是鄭莊門下客，報恩應擬在何年。

王元美席上賦得懷羅浮得餘字

縹緲丹梯萬仞餘，風塵回首列僊居。石樓積翠臨滄海，鐵柱飛泉落紫虛。鸞鶴凌霞時自度，松苓滿地日堪鋤。何當歸訪葛洪去，四百峯頭好結廬。

宗學憲

名臣字子相號方城揚之興化人嘉靖中官福建提學副使

寄人

浮颺動廣野，白日慘無色。之子在萬里，山川渺難極。豺狼滿路衢，况復荆與棘。我欲往從之，惜無晨風翼。因風寄瑤華，歲事日云夕。去住歎懽悰，撫膺長歎息。

山中夜坐

朔風亂掃江雲飛，山人爲余開石扉。一斗胡麻煮未熟，散髮千峯歌采薇。吳江楓落客已遠，楚塞秋深鴻未歸。明月墮地白如水，濕爾巖頭蘿薜衣。

山行

大江以南山作野，客子况復愛山者。日日山顛弄流泉，百丈銀河向人瀉。蒼龍翠虬滿山立，近之迺是梧與檟。怪石千尋聳欲墮，往往遊人下駐馬。

有寄

憶爾辭燕甸，逢人賦楚騷。芙蓉千水暮，薜荔萬峯高。秋

月驚紈扇寒雲落布袍愁心不可問孤鴈滯江臯

同于鱗子與元美郊行

去去春蘿好行行朝雨寒路迷頻勒馬塵起一彈冠宛
轉溪園出依稀江路看所嗟情不愜無處問漁竿

送王判

可歎數爲別兼之歲欲殘青袍今作吏白髮已盈冠鴻
鴈千門夕梅花一騎寒風塵好自愛行路古來難

問元美病

倦遊吾未敢抱病爾何心萬里靡蕪色秋風一夜深長
嘯豈不得悲歌直至今茂陵消渴日還聽白頭吟

寄黃山人

已厭時人目翻生古道悲洲中鸚鵡賦臺上鳳凰詩風
雨客多病江湖鬢有絲長途且萬里無夢寄相思

二月

二月春華滿鳳城萬家楊柳共愁生烽高紫塞愁都護
詔下甘泉議北征昨日羈縻胡市馬西風蕭瑟漢臣纓
瓊衣玉札殊恩澤蚤把勲勞答 聖明

送熊守之太倉因便省覲

羨爾新分刺史符南方千騎亂平蕪瀟湘天濶春歸楚
震澤風高曉入吳父老幾年憂戰伐使君到日問樵蘇

薊門舊侶能相憶，八月雙鴻起太湖。

○吳明卿席上有賦

陌上黃金俠者遊，薊門春草暮堪留。
一尊破爾青山夢，萬里懷人落日愁。
鸚鵡昔悲湘客賦，鷓鴣初典漢臣裘。
酒闌忽聽孤笳起，腸斷胡雲出塞秋。

寄陸子和

江門一別又秋分，何處風煙不憶君。
久客衣裳鶉自結，舊游尺素鴈爲羣。
十年世路彫青鬢，三歎斯人卧白雲。
羽翼南溟最相近，未須重勒北山文。

旅懷

遠塞風高暮角哀，浮雲終日去燕臺。
百年駿骨逢時晚，十月鴻書隔歲來。
錦水卽從巫峽出，青山定向劍門開。
獨傷人事多留滯，萬里停雲日幾迴。

趙山人至

千行垂柳暗江村，江上何人到石門。
倚仗年華垂素髮，登樓雨色滿清尊。
驟雷似有蛟龍怒，落日愁聞豺虎喧。
只此漁舟堪結侶，未須楚水問桃源。

盧山人

名柝，字少楸，號浮丘，濬縣人。嘉靖中坐事，逮繫十餘年，上書當塗，庶其寃平反之。

○襍詩

谿谷饒冰霜，幽澤多芳草。
朝煙滋綠輝，夕露發青藻。
芬

香披原塗弱葉亦俊好佳人殊未來繁華易枯槁悲哉
君子心綿綿在遠道歲寒見松栢可以喻終老
高樓有佳婦窈窕青雲端左蔭綠桂枝右紉芳澤蘭臨
流戲珠浦拾翠游芝田蛾眉衆所妬時俗尚無鹽捐棄
蓬蒿中誰來希令顏徘徊歲云暮拂衣聊長嘆

贈盧潭城

六龍推飈輪四運無停軌日春薄虞淵月朧昇玉壘飛
螢流雕甍微禽變玄海寒露被陵茗繁霜瘁江菹缺隙
馳白駒人命易頽改赤松旣渺茫安期亦誕晦苟非青
雲身焉能施後代鳳鳴振綺輝龍飛薄霧靄步趾須芳
林揚聲欲珍彩豈惟工雕蟲立心貴鼎鼐君懷璠璵姿
輝光茂真宰勗哉勤令圖雲衢會相待

王大伾草堂二首

中堂嘉樂陳紛華羅錦茵巴僮激清徵越女流商音一
奏驚回飈再奏生陽春中人莫云悟歌者徒勞心所以
重考槃永懷嘉樹林

嘉樹清且圓蔭彼城南田層枝棲孤鳳奕葉鳴寒蟬幽
人懷澹泊日夕獨盤桓桃李雖容艷蚤落春風前何如
主人樹茂育長千年

訓謝四溟

謝客恣霞想揮手絕人羣朝辭北燕里暮宿大梁雲海
月照舞席澄江瀉清瀆遠游憩靈境奇節冠秋雯黃鵠
思煙侶長鳴向夕曛

贈李子理

麒麟出魯郊商鉏爲不祥向非孔仲尼何異犬與羊所
以路傍人按劍嘿夜光近時青雲士豈無魯連子氣節
苟不申甘蹈東海死世人聞此言棄之如敝屣投君勿
復道北風吹易水

書柳川弟壁

衛川狹春游翩翩佳公子衣劍何照耀馳逐矜鄉里我

非揚子雲草玄常晏起坐觀桃李花秋風亦云已

送張壚山明府轉戶部

詔出彤龍樓官辭白馬縣落花飄雲游英風緬京甸欲
射聊城書解此圍海戰去去復何言悲歌振林霰

喜艾子給二子作此

天馬來何處本自濯龍媒蹠躩關山道黃雲萬里開歲
晚將名駒矯矯非凡材長鳴噴綠雪嚙膝眠紫苔神駿
一何爾倏忽遺纖埃異時獨不見飛上昭王臺

別李性菴還任丘

燕郊十月飛胡霜臨岐送子各盡觴腰間笑解延陵劍

雪花墮地蛟龍翔都門佳期那可顧相思開遍三花樹
歸時倘遇浮丘公爲余接引嵩高去

○送友人南還

鳳凰樓外雲氣長青袍白馬生輝光送君千里促羽觴
鳴箏清歌如故鄉相思明日忽分手誰把青驄繫綠楊

○七夕

銀闕含秋星欲爛天孫脉脉度河漢仙鬟玉珮那可聞
佳人夜半開簾看階前月色疑有霜獨坐穿針向畫廊
東方日出烏鵲曉天上人間枉斷腸

○寄謝四溟二首

漢京詞賦多風雅前揮鄒生後枚馬四溟旅人興最豪
馮軒落筆長河瀉醉中一別十經秋落葉翩翩嘆白頭
思君恨無黃鵠羽涕泗遙瞻滄海樓

海水飛動凌三山巨鼇出沒流其間人生風波有如此
颺颺秋風凋玉顏魯連自是紫煙客倜儻長揖二千石
一朝談笑解聊城東入滄溟渺無跡

○送李滄溟太守入覲

襄城太守濟南客夜發雙旌搖海月城頭箕子超天河
城外征人吹曙笛父老扶杖前致辭太守此去人皆知
內史親傳大官饌野人共拜甘棠祠黃霸功名何足數

公車詔入鳳凰池

雪霽後過周紫泉山堂

紫泉山堂在何許衛溪東岸蒼山麓青松偃蹇雪意寒
孤光晚映琅玕竹紫泉調笑宛在目亂雲奇壑相縈觸
我欲於此傾醽醑開襟醉卧青山屋絕境幽森不可留
野狐夜叫猿嘯秋別去長懷紫泉客滿林楓葉冷颼颼

苦寒吟

北風怒號河水折鑿氷慘澹鮫人窟琉璃應手忽破碎
天吳回首蛟龍血錦鱗撥刺入豪門鸞刀玉斧飛紅雪
馮謹夜坐食無魚彈鋏高歌氣未舒方袍着凍冷如鐵

嘯呼霜霰攢兩眉星火不然寒欲死皮皴肉裂老無齒
誰能醉解驕驕裘別有權家會戚里苦寒吟苦寒之吟
不可聞古來傑士多餓死何必垂首涕交紛

壚崑謠呈張壚山明府

朝乘五嶽鶴暮望十洲雲尋山不厭壚崑遠笑謁壚崑
入紫氛壚崑名嶽天下聞巴江前繞接氤氳翠屏斜軋
幾萬丈玄猿夜嘯臨江濱馮夷水仙何超忽凌風起舞
壚崑月蒼藤翳靄看不見欲上壚崑苔徑滑昔聞天台
山峒嶢摩天關赤城起霞色王喬時來還洞天已與壚
崑別爲說壚崑生汗顏壚崑謠謠且遠仙茅千載留靈

根玉葉金葩待君飯君意詎可論恍若岷山源滿漉赴
溟海聊可比君恩生來不識噓崑崙路此身幾日登噓崑
嶺崑崙謚謚未已蚤晚化爲噓崑原上之青松常倚噓崑
望江水

子夜吳歌

燕花敷錦繡楚舞醉羅裙明月空悲妾白雲常似君不
知遼海上書信幾時聞

涼州樂

月氏穹廬夜秋風起暮笳胡星沒鴻塞漢月湧龍沙露
滴葡萄酒天寒首蓂花從軍莫浪譖轉戰屬輕車

東塘行

暮秋搖落金井煙瑤窻月出愁無眠詣君四座且勿嘆
聽我試歌東塘篇東塘春風樂遊冶寶帶螭盤騎白馬
朝從狡兔上闌東暮鬪金雞長干下儂家繡被金錯牀
逢迎七十紫鴛鴦生來孱小無人見艷着荷花嬌上妝
錦瑟春生鳳凰柱翠袖香凝蛺蝶縷浮雲小駐緩聲歌
花葉驚翻垂手舞盼睐流波媚笑顏此時恩愛比南山
那知輕薄易年少一別迢迢隔玉關儂心歷落如秋草
西風吹折江南道江雲斷盡君不來會使蛾眉待君老
東家買得錦鱗魚中有傳情尺素書君身亦是臨江客

何惜相思一字予機中罷却流黃織爲恨東塘淚霑臆
寄語春陵遊俠兒莫學東塘負傾國

大名故城

魏郡遺空壘蒼蒼接水湄鴈衝斜鳥陣柳拂捲龍旂樓
閣青雲恨陂塘白日悲北門無鎖鑰腸斷立郊陲
服闋口號上張鄧西明府無吳吏部李翰林
獄久年三換刑深釐二毛愁淹天畔日淚作海門濤寸
草傷春碧慈烏近夜號感時思雨露回首望旌旄

隴水曲

隴山當面起隴水向西流中含妾墮淚幾日到涼州

少年行

長安俠客多少年醉歌擊筑南山邊相逢不避魯勾踐
一夜擲盧得萬錢

青樓詞

百尺高樓挂彩煙錦箏銀甲亂哀絃夕陽西下簾深捲
望見西江萬里船

洪山人

名孝先字從周號霍山永嘉人嘉隆中嘗游燕秦間

冬日微雪同張壚山開府孟津道中

扶策通幽徑鳴鑣動石泉塵銷嵩少雪樹繞漢陵煙斷
草迷殘碣枯陽隔暮田客心棲未定飛鳥日相騫

春日遊南池歸晚馬上口占

池上春雲暗柳條
嬌歌輕拽木蘭橈
山深樹色浮朱殿
洞曲虛聲隱碧簫
家遠祇看秦嶺月
心閒不問越江潮
郊原處處還芳草
獨有南蒐賦未招

過清溪道院訪段煉師不遇

嚶嚶好鳥弄晴暉
坐對仙臺懶拂衣
丹竈遠分關氣紫
洞門深鎖藥苗肥
雲開華嶽心常到
春滿天台客未歸
空有桃花隔流水
浪遊方覺半生非

同許後谷少谷雙塘諸君遊桃林

縱酒桃林花霧醺
石坪高柳綠初分
青苔幾處沾紅雨

紫氣當關較白雲
心逐輕塵還馬足
觴臨流水見鷺羣
不須更問傳經所
古洞頻看赤字文

冬日同張嵒岫開府集楊漳渠少叅第

晴風初入草玄居
簾薄寒雲柳並疎
曲徑引泉惟灌竹
高齋虛榻半藏書
青春得意偏辭祿
綠酒逢人欲挂車
吾道滄洲慚未隱
風塵長缺尚無魚

送別安硯亭出京

燕山秋蒼蒼吳雲日皓皓
紫騮白玉蹄嘶出長安
道枯楊摧我心攀折已無枝
征鴻渡江水渺渺月明時

夏日同余同麓何震川成鑒吾沈澄川遊鄧園

亂塍分野色高柳散城陰荷歇催花雨蟬流遠樹音煙
青山覺重蘋白露還深把酒涼風下停歌思素琴

秋懷二首

薊門秋望碧雲深結社還思卧石林木葉西風看似錦
音書南國到如金哀猿嘯處長流涕倦鳥歸時總息心
自是蓴鱸堪寄興扁舟欲汎五湖陰

燕昭舊地有高臺千里駒從宛國來不信黃金能結客
始知清世未憐才月中胡騎秋先遁柝上雞聲夜自開
慘澹陰風何處是石州榛莽日生哀

曾聞武帝有行宮辛苦朝朝禮太空鶴駕一從辭夜月

星壇長自鎖秋風彩幡半落寒雲外畫壁金銷別殿中
舊日詞臣多意氣謾令玄草擬揚雄

同余同麓太史遊功德寺

長松落落寄蒿萊淨鏡空遺演法臺輦道不聞通紫氣
斜陽猶自照蒼苔行看幡影宮中盡偶發鐘聲象外來
莫問從前功德水至今惟有芟荷開

送項秀谿還半華山房

萬樹藏山閣孤亭出海城雲深頻見鹿花暖亂聞鶯秀
嶺千盤翠飛泉一線清不須問瑤島已足寄長生

張選部

名九一字助甫汝寧人嘉靖中官文選郎

同邦陳汎漾口值江漲

七澤花堪盡。三巴雪始消。來從巫峽險。瀉入楚江遙。岸
葦浮爲舫。檣鳥去作橋。亦知稱處士。解送伍胥潮。

○飲伯璠奉常亭

地引東山屐。春生北海尊。尊湖浮畫棟。瓜地隔青門。雙
燕衝簾語。羣峯入戶蹲。草芳王粲宅。花抱武陵源。曉霧
文玄豹。寒煙嘯白猿。池龍堪化杖。階鶴可乘軒。人帶滄
霞色。巾餘漉酒痕。賦傳十二峽。書著五千言。避世初依
桂。忘憂或藉萱。風塵難出處。流落信乾坤。染竹成湘淚。
衣蘭似楚魂。會當因病免。歸卧茂陵園。

○蒲圻道中

風濤不可楫。石路詎能梯。灌木留猿嘯。長風送虎啼。雲
歸一壑暝。日落萬峯迷。五柳誰家宅。蒼茫認故蹊。

七月一日夜

不寐成危坐。多愁恨獨醒。晴空明遠電。涼露濕繁星。河
色迎秋白。江流入夜青。九疑何處是。吾欲問湘靈。

殘日

怪鳥啼殘日。奇峯挂片雲。波濤城市合。煙火舳艫分。卧
並蛟龍穴。遊將虎豹羣。更傳銅柱北。新駐越南軍。

送王使君提兵入蜀

巫峽秋聲灑，瀕孤王導叱馭競前驅。洗兵雨淨三苗國，吹角風高八陣圖。棧道燒殘西極紫，巴山開盡巨靈趨。懸知劍閣題銘處，還與燕然片石俱。

舟夜次石磯頭垂溺，覓得沙洲尺許遲。明乃濟放船，大自好落日故相催。雲氣俄驅墨江聲，驟輾雷天傾三峽。倒潮擁伍胥，回吹浪頭俱白揚。塵心與灰鵬初搏夢澤，玉豈御蘭臺。細檝隨飄梗，扁舟只渡杯。巢堪鸚鵡借門許，鷓鴣來自是僊人。態非關帝女，災楓杉秋色。苦鼓角夜聲哀，漸覺千峯曙。驚鬼徧綠苔。

小至公安道中

江濤流入呂蒙營，野色蕭條暮雪平。一水人煙臨落照，萬家春氣抱荒城。梅花鮮墮孤臣淚，芳草深知故國情。黍谷向來甘寂寞，肯從鄒衍問生成。

燕集孟真山亭時約卿載酒自宐都來訪分賦
江亭含夕景，蒼翠遍諸峯。客自山陰至，人如谷口逢。秋風收芋栗，寒雨落芙蓉。莫怪多雲氣，隆中暫卧龍。

題劉子真東山草堂

吏部那無啟文園，且暫還尊傾河朔。酒林有會稽山徑，竹含疎翠籬光吐。細斑忽吟招隱曲，流水亦潺湲。

巫山漫興

峽裏天河細沙間路轉紆雲從江面起。雨到巔頭無鄉
國遼東鶴。朝廷葉縣鳧。卽今愁裏病不是著潛夫。

寄見甫弟

歷盡巴山白髮新西風何處不傷神馬曹蹭蹬官難起
鳥道艱危老更貧九派長江春後鴈一年芳草夢中人
相思况是無消息徙倚天涯涕淚頻

山人吳志道以子與元美書見訪

朔雪千峯映敝裘誰從憔悴問江洲瀟湘忽送叢篁淚
鴻鴈遙舍尺素愁署裏青天雙壁洞斗間紫氣一龍浮
中原一別無消息散落風塵總白頭

寄子與

領郡曾傳沈隱侯歸來何處更登樓燕春不度鄒生律
郢雪常含宋玉愁作賦月明黃蘗澗懷人秋滿白蘋洲
虛疑海上窺三島猶自江東滯一丘

寄元美

海上明霞擁赤城春風高卧蒨薇生狂從方外爲司馬
老向江東號步兵縱飲祇供鸚鵡舞據梧還作鳳凰鳴
向來誇我藏名手年少何年尚借行

寄德甫

長安一別鬢俱華客淚蕭條滿暮笳白社可容陶令酒

青門堪種邵平瓜風塵病起逢江鴈湖海歸來失漢槎
正是楚天寥落後好從桂樹問移家

人日偕樊一賢林子順遊洪山寺分韻得人字

丹梯縹緲歷千盤漢水湘雲萬里看夜雨乍催雙樹長
春陰猶抱九峯寒杯傳初地鐘聲合客散諸天月色殘
若向登高論作賦郢中原自和歌難

初至家陳道義瞿睿甫見過

歸及青春半芳園二仲來月生桐栢水雲斷景夷臺玉
笛梅花落金樽竹葉開今宵張仲蔚爲爾剪蒿萊

奉和之順陽溪別業之作

千峯羅杖底選勝武夷傍夜雨靡蕪徑春風薜荔墻引
渠分海色種竹惹嵐光會發王猷興籃輿就辟疆

寄敬美

翩翩二陸雄江左更有諸王未可攀芳草池流太湖水
連枝樹發洞庭山馬卿著賦供多病梅福逃名善閉關
海內只今誰辯璧可憐清淚落人間

○陪熊憲副登秭歸郡樓分賦

城頭月出照高堂城下江波白練光驚鵲頻翻巫峽樹
征鴻遙度洞庭霜庾公自愛葉秋色王粲深悲滯異鄉
爲借天風吹玉笛招呼黃鶴共翱翔

送林使君子順之嶺南兼寄宐川謝尹

黃河雪後亂鴻聲，驄馬看君萬里行。
卧病淮南叢桂樹，題書天畔五羊城。
嶺頭梅發催春別，合浦珠還代月明。
從此蠻荒停羽檄，伏波今在漢家營。

寄萬方伯章甫

天邊落日照中原，萬里蕭條斷客魂。
曾是夷門抱關者，只今常感信陵恩。

寄樊僉憲一賢

同是三湘放逐臣，歸來猶自厭風塵。
長沙日落秋陰滿，愁殺當時痛哭人。

余憲副

名應舉字德甫號午渠南
昌人嘉靖間福建副使

七夕同吳給事王比部宗考功燕集張園

山亭元自好，此夕更徜徉。
雲裏支機石，風前薜荔裳。
樽當明月滿，歌遶碧河長。
諸阮留連意，空餘犢鼻狂。

除夕奉答匡南見懷

頻年常客裏，茲夕草堂中。
玄理諳時薄，交游感歲窮。
鬢添明日白，花近故園紅。
不必煩生事，椒漿任轉蓬。

張吏部席上留別得秋字

明發孤帆又楚州，華陽不惜此淹留。
星辰歷亂開尊夜，蘿薜陰森別院秋。
白壁向人多按劍，黃金閱世幾披裘。

亦知平子逢時思莫爲羈人賦四愁

再寄王元美兄弟

濁酒柴門老更狂。不因時俗問行藏。芙蓉秋晚空江海。
薜荔春深勝鷓鴣。楚曲何人堪孺子。吳中二美得王郎。
天門夜半風雷起。銷盡人間六月霜。

答張肖甫見訊

風塵歸後遠人羣。不遣妻其穎上聞。驄馬殷勤憐楚客。
雙魚迢遞到江濱。年光暗覺隨流水。世路何妨卧白雲。
獨有明霞餐未盡。將因千里報夫君。

國雅卷之十六

聖